

**BOSNA I HERCEGOVINA
FEDERACIJA BOSNE I HERCEGOVINE
Federalna agencija za upravljanje oduzetom imovinom**

IZVJEŠTAJ

**O RADU I FINANSIJSKO-MATERIJALNOM POSLOVANJU
FEDERALNE AGENCIJE ZA UPRAVLJANJE ODUZETOM IMOVINOM
ZA PERIOD 1. 7 – 31. 12. 2017. GODINE**

Sarajevo, januar 2018. godine

SADRŽAJ

1. UVOD	3
2. NADLEŽNOST AGENCIJE	4
3. RUKOVOĐENJE I ORGANIZACIJA AGENCIJE	5
3.1. Rukovođenje	5
3.2. Organizacija	6
4. UPRAVLJANJE ODUZETOM IMOVINOM	7
4.1. Postupanje Agencije po odlukama nadležnih sudova	7
4.2. Predmeti u radu	8
5. STRATEŠKI CILJEVI	16
5.1. Jačanje kapaciteta Agencije za upravljanje oduzetom imovinom	16
5.2. Upravljanje privremeno i trajno oduzetom imovinom u skladu s nadležnostima Agencije	21
5.3. Provođenje analiza u području oduzimanja imovinske koristi pribavljene krivičnim djelom	25
6. OSTALE AKTIVNOSTI AGENCIJE	27
6.1. Primjena instrukcije Javnog komuniciranja Agencije i upoznavanje javnosti s primjenom Zakona	27
6.2. Izrada Plana integriteta	27
6.3. II sastanak Pododbora za pravdu, slobodu i sigurnost između Evropske unije i Bosne i Hercegovine	28
7. STVARANJE FINANSIJSKIH PREDUVJETA ZA RAD AGENCIJE	28
7.1. Stvaranje finansijskih preduvjeta za rad Agencije	28
7.2. Pregled odobrenih i utrošenih sredstava na dan 31.12.2017. godine	28

Na osnovu člana 29. Zakona o oduzimanju nezakonito stečene imovine krivičnim djelom („Službene novine Federacije BiH“, broj 71/14), a u vezi s čl. 17. i 18. Uredbe o planiranju rada i izvještavanju o radu Vlade Federacije Bosne i Hercegovine, federalnih ministarstava i institucija („Službene novine Federacije BiH“, br. 89/14 i 107/14), te Zaključka Vlade Federacije Bosne i Hercegovine o davanju saglasnosti na Plan rada Federalne agencije za upravljanje oduzetom imovinom za 2017. godinu V. broj: 127/2017 od 27. 1. 2017. godine, direktor Federalne agencije za upravljanje oduzetom imovinom Vladi Federacije Bosne i Hercegovine p o d n o s i

I Z V J E Š T A J

O RADU I FINANSIJSKO-MATERIJALNOM POSLOVANJU FEDERALNE AGENCIJE ZA UPRAVLJANJE ODUZETOM IMOVINOM ZA PERIOD 1.7 – 31.12.2017. GODINE

1. UVOD

Federalna agencija za upravljanje oduzetom imovinom (u daljem tekstu: Agencija) nezavisna je i samostalna upravna organizacija osnovana Zakonom o oduzimanju nezakonito stečene imovine krivičnim djelom („Službene novine Federacije BiH“, broj 71/14).

Propisi u Federaciji Bosne i Hercegovine koji definiraju ovu oblast, a samim tim utječu na rad Agencije, osim navedenog Zakona o oduzimanju nezakonito stečene imovine krivičnim djelom („Službene novine Federacije BiH“, broj 71/14 - u daljem tekstu: Zakon) su Krivični zakon Federacije Bosne i Hercegovine („Službene novine Federacije BiH“, br. 36/03, 37/03, 21/04, 69/04, 18/05, 42/10, 42/11, 59/14, 76/14 i 46/16 i 75/17), Zakon o krivičnom postupku Federacije Bosne i Hercegovine („Službene novine Federacije BiH“, br. 35/03, 37/03, 56/03, 78/04, 28/05, 55/06, 27/07, 53/07, 9/09, 12/10, 8/13 i 59/14), Zakon o izvršnom postupku Federacije Bosne i Hercegovine („Službene novine Federacije BiH“, br. 32/03, 52/03, 33/06, 39/06, 35/12 i 46/16) i Pravilnik o postupku prodaje, najma, čuvanja i održavanja oduzete imovine („Službene novine Federacije BiH“, broj 5/16).

Pitanja koja se odnose na izvršenje novčanih kazni, sankcija za privredne prestupe, prekršajnih sankcija i mjera sigurnosti, a koje nisu regulisane Zakonom o izvršenju krivičnih sankcija u Federaciji Bosne i Hercegovine („Službene novine Federacije BiH“, br. 44/98, 42/99, 12/09 i 42/11), uređena su kantonalnim zakonima.

Na osnovu navedenih zakona i podzakonskih akata, Agencija preuzima i upravlja oduzetom imovinom nezakonito stečenom krivičnim djelom.

Agencija je samostalna federalna upravna organizacija koja ima svojstvo pravnog lica.

Zakon je utvrdio da je sjedište Agencije u Sarajevu.

U okviru svoje nadležnosti Agencija ima javna ovlaštenja za donošenje podzakonskih akata kojima se uređuje način djelovanja Agencije, pa je na osnovu tog ovlaštenja Agencija donijela Odluku o utvrđivanju kriterija obračuna troškova

čuvanja i održavanja privremeno oduzete imovine („Službene novine Federacije BiH“, broj 60/16), Uputstvo o načinu provođenja postupka javnog nadmetanja prodaje trajno oduzete imovine („Službene novine Federacije BiH“, broj 57/16) i Uputstvo o uspostavi, vrsti i sadržaju evidencija o upravljanju i raspolaganju nezakonito stečenom imovinom krivičnim djelom („Službene novine Federacije BiH“, broj 2/17).

Na radnopravni status osoba zaposlenih u Agenciji primjenjuju se odredbe Zakona o državnoj službi u Federaciji Bosne i Hercegovine („Službene novine Federacije BiH“, br. 29/03, 23/04, 39/04, 54/04, 67/05, 8/06, 77/06, 4/12 i 99/15) Zakona o namještenicima u Federaciji Bosne i Hercegovine („Službene novine Federacije BiH“, broj 49/05), Zakona o radu („Službene novine Federacije BiH“, broj 26/16) i Kolektivni ugovor za službenike organa uprave i sudske vlasti u Federaciji Bosne i Hercegovine (Službene novine Federacije BiH, br. 23/00, 50/00, 97/13, 18/16 i 89/16).

2. NADLEŽNOST AGENCIJE

Nadležnosti Agencije utvrđene su članom 30. Zakona i to:

- upravljanje privremeno oduzetom i oduzetom imovinom po odredbama Zakona i drugih zakona;
- provođenje analiza u području oduzimanja imovinske koristi pribavljene krivičnim djelom;
- stručna edukacija iz područja finansijskih istraga i oduzimanja imovinske koristi pribavljene krivičnim djelom i
- obavljanje i drugih poslova propisanih Zakonom.

Agencija u provođenju svojih nadležnosti obavlja sljedeće poslove:

- skladišti, čuva, prodaje, vrši najam imovine oduzete na osnovu Zakona. Ako za to postoji opravdana potreba, ovu imovinu Agencija može povjeriti na čuvanje drugoj instituciji o čemu se zaključuje poseban ugovor;
- vrši stručnu procjenu vrijednosti privremeno oduzete i oduzete imovine po odredbama ovog i drugih zakona;
- vodi evidencije o imovini kojom raspolaže i upravlja, sudskim postupcima u kojima se odlučuje o takvoj imovini;
- prikuplja od nadležnih institucija podatke, statističke izvještaje i druge informacije iz pravomoćno okončanih postupaka za oduzimanje imovinske koristi u skladu sa Zakonom, s ciljem obrade i analize tih podataka i informacija, uočavanja trendova u vršenju krivičnih djela iz kojih se pribavlja imovinska korist;
- prikuplja informacije iz sudskih registara, Porezne uprave, Registra vrijednosnih papira i drugih javnih registara koji se tiču vlasništva nad imovinom;
- vrši analize i procjene rizika s ciljem identifikacije faktora i okolnosti koji pogoduju pribavljanju imovinske koristi iz vršenja krivičnih djela;
- objavljuje redovne i godišnje izvještaje o stanju u oblasti oduzimanja imovinske koristi pribavljene krivičnim djelom, te ih dostavlja Vladi Federacije Bosne i Hercegovine (u daljem tekstu: Vlada Federacije BiH) i Parlamentu Federacije Bosne i Hercegovine (u daljem tekstu: Parlament Federacije BiH);

- obavještava Vladu Federacije BiH i Parlament Federacije BiH o rezultatima analiza u području provođenja zakona ili drugih propisa o finansijskim istragama i oduzimanju imovinske koristi pribavljene krivičnim djelom;
- inicira i daje preporuke za unapređenje pravnih propisa u oblasti provođenja finansijskih istraga i oduzimanja imovinske koristi pribavljene krivičnim djelom;
- sačinjava prijedlog Strategije za oduzimanje imovinske koristi pribavljene krivičnim djelom u Federaciji Bosne i Hercegovine (u daljnjem tekstu: Strategija) i Akcionog plana za njeno izvršenje, te ih upućuje Vladi Federacije BiH i Parlamentu Federacije BiH na usvajanje;
- koordinira i prati provođenje Strategije i Akcionog plana, te daje mišljenja i preporuke za njihovo efikasnije provođenje i
- u saradnji s drugim nadležnim institucijama učestvuje u obuci državnih i policijskih službenika i nosilaca pravosudnih funkcija u vezi s finansijskim istragama i oduzimanjem imovinske koristi pribavljene krivičnim djelom.

Agencija poslove iz svoje nadležnosti obavlja samostalno u granicama ovlaštenja utvrđenih Zakonom i drugim propisima, te u okviru raspoloživih finansijskih sredstava i odobrenog broja izvršilaca od strane Vlade Federacije.

3. RUKOVOĐENJE I ORGANIZACIJA AGENCIJE

Rukovođenje Agencijom je utvrđeno u članu 26. stav (2) i (3) Zakona, dok su ovlasti direktora, poslovi organizacionih jedinica i ostala pitanja vezana za organizaciju, upravljanje i rukovođenje organizacionim jedinicama utvrđeni Pravilnikom o unutrašnjoj organizaciji Federalne agencije za upravljanje oduzetom imovinom na koji je Vlada Federacije BiH dala saglasnost Odlukom V. broj: 1092/2015 od 27.08.2015. godine („Službene novine Federacije BiH“, broj 68/15), kao i drugim pravilnicima i aktima koji se odnose na radne odnose i cjelokupno funkcionisanje Agencije.

3.1. Rukovođenje

Po Pravilniku o unutrašnjoj organizaciji Federalne agencije za upravljanje oduzetom imovinom, rukovodna radna mjesta su:


- direktor Agencije;
- sekretar Agencije;
- pomoćnik direktora u Sektoru za preuzimanje i upravljanje oduzetom imovinom;
- pomoćnik direktora u Sektoru za analitičko-strateške poslove;
- pomoćnik direktora u Sektoru za edukaciju;
- pomoćnik direktora u Sektoru za pravne i opće poslove, i
- pomoćnik direktora u Sektoru za materijalno-finansijske poslove.

U ovom izvještajnom periodu popunjena rukovodna radna mjesta su direktor Agencije, koji rukovodi radom Agencije i vrši poslove utvrđene članom 28. Zakona, pomoćnik direktora u Sektoru za preuzimanje i upravljanje oduzetom imovinom i pomoćnik direktora u Sektoru za analitičko-strateške poslove koji rukovode organizacionim jedinicama i u tom pogledu imaju ovlaštenja koja su utvrđena u članu 21. Pravilnika o unutrašnjoj organizaciji Agencije.

3.2. Organizacija


Pravilnikom o unutrašnjoj organizaciji Agencije, predviđeno je da poslove i zadatke izvršava 40 uposlenika, organizovanih u pet organizacionih jedinica i to:

1. Sektor za preuzimanje i upravljanje oduzetom imovinom;
2. Sektor za analitičko-strateške poslove;
3. Sektor za edukaciju;
4. Sektor za pravne i opće poslove i
5. Sektor za materijalno-finansijske poslove.



Grafikon 1: Organizaciona shema Agencije

Na kraju izvještajnog perioda poslove i zadatke u Agenciji obavlja 13 uposlenih, što je 32,5 % od ukupnog broja sistematizovanih radnih pozicija.



Grafikon 2: Procenat uposlenih u Agenciji

Svi poslovi iz nadležnosti Agencije koji su izvršeni u izvještajnom periodu su obavljani unutar navedenih organizacionih jedinica s raspoloživim brojem uposlenika, kao i nastavkom uspostavljenih ugovornih odnosa s kvalificiranim fizičkim licima.

4. UPRAVLJANJE ODUZETOM IMOVINOM


4.1. Postupanje Agencije po odlukama nadležnih sudova

U periodu juli - decembar 2017. godine, Agencija je osim postupanja po predmetima zaprimljenim u ranijem izvještajnom periodu, postupala i po 10 novozaprimljenih sudskih odluka, od čega pet presuda o trajnom oduzimanju nezakonito stečene imovinske koristi i pet rješenja o određivanju privremenih mjera.

Trenutno Agencija upravlja imovinom vrijednom cca. 15 miliona konvertibilnih maraka (14 627 191,76 KM), a radi se o oduzetim novčanim sredstvima, dionicama, nekretninama, hotelu, studentskom domu, benzinskoj pumpi, motornim vozilima, građevninskom materijalu i drugo.



Grafikon 3: Vrsta oduzete imovine



Grafikon 4: Struktura preuzete imovine kojom upravlja Agencija

4.2. Predmeti u radu

4.2.1. Postupanje po predmetima zaprimljenim u izvještajnom periodu

Agencija je u periodu od 1.7.2017. godine do 31.12.2017. godine postupala po 10 novozaprimljenih sudskih odluka, od čega pet presuda o trajnom oduzimanju nezakonito stečene imovinske koristi i pet rješenja o određivanju privremenih mjera.

U daljem tekstu izvještaja hronološki su predstavljene aktivnosti preduzete od strane Agencije po zaprimljenim sudskim odlukama:

1. Rješenje Kantonalnog suda u Sarajevu, datum zaprimanja 18.7.2017. godine

Dana 18.7.2017. godine Agencija je zaprimila Rješenje Kantonalnog suda u Sarajevu br. 09 0 K 021547 17 Kv 34 od 14.7.2017. godine kojim je određena privremena mjera osiguranja imovinske koristi stečene krivičnim djelom i to u obliku oduzimanja nekretnine od optužene osobe i povjeravanja iste na upravljanje Agenciji. Pored navedenog, izvršen je upis odgovarajućih zabilježbi u zemljišne knjige za predmetnu nekretninu. Izrečena mjera će trajati do okončanja krivičnog postupka ili do druge odluke suda. Riječ je o luksuznom stambenom objektu u Sarajevu. S ciljem provođenja rješenja, Agencija je preduzela raspoložive aktivnosti radi zaključenja ugovora o zakupu navedene nekretnine s postojećim korisnikom, odnosno zakupcem iste. S obzirom na navedeno, pristupilo se izradi Ugovora o zakupu koji je nakon dorada i kontrole od strane nadležnog ministarstva predmetne ambasade u matičnoj državi potpisan početkom septembra 2017. godine. Neposredno nakon toga službenici Agencije su izašli na lice mjesta te izvršili i preuzimanje objekta o čemu su sačinili i zapisnik. Predmetna ambasada vrši redovnu mjesečnu uplatu zakupnine na račun za posebne namjene Agencije, što je i bio cilj sudske odluke, odnosno onemogućiti dalje nezakonito sticanje sredstava od strane optuženih lica.

Postupajući u skladu zakonske obaveze očuvanja vrijednosti oduzetih objekata, Agencija je bila spremna da poduzme radnje radi osiguranja istog od rizika poput poplave ili požara. U tom postupku došla je do saznanja da je predmetna nekretnina već osigurana, te da isto osiguranje vrijedi do kraja februara 2018. godine. S obzirom na navedeno, po isteku postojećeg osiguranja, Agencija će poduzeti odgovarajuće korake ka daljnjem očuvanju vrijednosti te nekretnine.

Kako bi se na najbolji mogući način očuvala vrijednost navedene nekretnine, Agencija je zaključila ugovor s održavateljem stambenih objekata koji će vršiti redovno održavanje, te potrebne intervencije na objektu radi otklanjanja eventualnih nedostataka na istom.

2. Rješenje Kantonalnog suda u Sarajevu, datum zaprimanja 24.7.2017. godine

Dana 24.7.2017. godine Agencija je zaprimila Rješenje Kantonalnog suda u Sarajevu br. 09 0 K 021547 Kv 35 od 21.7.2017. godine kojim je određena privremena mjera osiguranja imovinske koristi stečene krivičnim djelom i to u obliku oduzimanja gotovog novca u iznosu 105.500,00 EUR od optužene osobe i povjeravanja predmetnog novca Agenciji na upravljanje. Izrečena mjera će trajati do okončanja krivičnog postupka, odnosno do druge odluke suda. Agencija je, u skladu sa zakonskim obavezama, odmah po zaprimanju predmetnog rješenja preduzela odgovarajuće korake, te u saradnji sa Sudskom policijom Federacije Bosne i Hercegovine istog dana izvršila fizičko preuzimanje gore navedenog novčanog iznosa iz prostorija suda, te transport i uplatu istog u banci na račun posebnih namjena kojim upravlja Agencija.

3. Presuda Općinskog suda u Tuzli, datum zaprimanja 24.7.2017. godine

Dana 24.7.2017. godine Agencija je zaprimila Presudu Općinskog suda u Tuzli br. 32 0 K 191708 14 K od 19.9.2016. godine, koja je postala pravosnažna 5.6.2017. godine. Navedenom presudom od osuđene pravne osobe oduzeta je imovinska korist u iznosu 25.650,00 KM. S obzirom na činjenicu da je riječ o imovinskoj koristi koja se tek ima naplatiti kroz izvršni postupak, Agencija je u skladu sa zakonskim obavezama i ovlaštenjima neposredno nakon zaprimanja iste, prosljedila predmetnu presudu Federalnom pravobranilaštvu na dalje nadležno, zakonsko postupanje, tj. podnošenje prijedloga za izvršenje na imovini osuđene pravne osobe kako bi se presudom utvrđeno potraživanje Federacije Bosne i Hercegovine namirilo. Slijedom navedenog, Federalno pravobranilaštvo je sredinom oktobra 2017. godine obavijestilo Agenciju da je s osuđenom pravnom osobom postignut sporazum o uplati predmetnog novčanog iznosa u budžet Federacije Bosne i Hercegovine kroz pet rata. Shodno sporazumu, osuđena pravna osoba vrši redovne mjesečne uplate s ciljem izmirenja utvrđenog duga.

4. Rješenje Općinskog suda u Zenici, datum zaprimanja 8.8.2017. godine

Dana 8.8.2017. godine Agencija je zaprimila Rješenje Općinskog suda u Zenici br. 43 0 K 145779 17 Kpp 9 od 4.8.2017. godine kojim je određena privremena mjera osiguranja imovinske koristi pribavljene krivičnim djelom u trajanju od šest mjeseci i to u obliku zabrane otuđenja, opterećenja ili raspolaganja motornim vozilima

osumnjičenog lica i to putničkog motornog vozila Audi A6 i motocikla Gilera Nexus 300. Predmetnim rješenjem je određen i upis zabilježbi zabrana u registar nadležnog MUP-a. Također, određena je i predaja navedenih vozila Agenciji na upravljanje. Dana 8.8.2017. godine izvršeno je preuzimanje motornih vozila, te njihov transport iz Zenice u skladište Agencije u Rakovici, gdje su ista i deponovana. Tom prilikom izvršen je tehnički pregled motornog vozila, te fotografisanje istog radi dokumentovanja stanja u kojem se nalazi. S obzirom da BIHAMK u datom trenutku zbog tehničkih razloga nije mogao obaviti tehnički pregled motocikla, pregled je obavljen naknadno kad su se stekli uvjeti za isto.

Kako bi se očuvala vrijednost oduzete imovine, odnosno motornih vozila, Agencija vrši redovne tehničke i vizualne preglede motornih vozila putem ovlaštenih serviserica kako bi se ustanovila ispravnost i funkcionalnost istih. Pored navedenog, Agencija je angažovala ovlaštenog sudskog vještaka kako bi izvršio procjenu predmetnih vozila što je i urađeno u oktobru 2017. godine. Kako bi se zaštitila motorna vozila od rizika poput požara i poplava dok su deponovana u skladištu Agencije, Agencija je ista osigurala krajem oktobra 2017. godine.

5. Presuda Općinskog suda u Lukavcu, datum zaprimanja 16.8.2017. godine

Dana 16.8.2017. godine Federalno pravobranilaštvo je dostavilo Agenciji na dalje postupanje Presudu Općinskog suda u Lukavcu br. 126 0 K 187270 16 K od 17.7.2017. godine kojom je od osuđenih lica trajno oduzeta nezakonito stečena imovinska korist u iznosu 8.172,76 KM. Kako je Zakonom o oduzimanju nezakonito stečene imovine krivičnim djelom u Federaciji Bosne i Hercegovine propisano da isključivo Federalno pravobranilaštvo može pokrenuti prijedlog za izvršenje u kontekstu navedenog zakona, Agencija je neposredno nakon prijema predmetne odluke istu poslala natrag Federalnom pravobranilaštvu uz obrazloženje da je ono jedini organ u skladu s prethodno navedenim zakonom ovlašten za podnošenje prijedloga za izvršenje. Federalno pravobranilaštvo je sredinom oktobra 2017. godine obavijestilo Agenciju da je na predmetnu presudu izjavljena žalba, te se iz tog razloga ista ne može izvršiti u kontekstu pokretanja izvršnog postupka. Po pravosnažnosti presude, a u skladu sa Zakonom o oduzimanju nezakonito stečene imovine krivičnim djelom u Federaciji Bosne i Hercegovine, te Zakonom o izvršnom postupku Federacije Bosne i Hercegovine, pokrenut će se izvršni postupak na imovini osuđenih lica s ciljem naplate potraživanja Federacije Bosne i Hercegovine.

6. Presuda Općinskog suda u Tešnju, datum zaprimanja 28.8.2017. godine

Dana 28.8.2017. godine Agencija je zaprimila Presudu Općinskog suda u Tešnju br. 39 0 K 046707 17 K od 12.5.2017. godine kojom je od osuđenog lica trajno oduzet novčani iznos od 20,00 KM. Kako je riječ o gotovom novcu kojeg se, u skladu s Zakonom moralo preuzeti radi uplate istog u budžet Federacije Bosne i Hercegovine, Agencija je neposredno nakon prijema presude, izvršila fizičko preuzimanje predmetnog novca u prostorijama Policijske uprave Tešanj, te uplatu istog u budžet Federacije Bosne i Hercegovine.

7. Rješenje Općinskog suda u Zenici, datum zaprimanja 21.9.2017. godine

Dana 21.9.2017. godine i 29.9.2017. godine Agencija je zaprimila Rješenje i dopunu istog rješenja br. 43 0 K 151041 17 Kpp od 19.9.2017. godine, odnosno 27.9.2017. godine kojim je osumnjičenoj osobi izrečena privremena mjera osiguranja imovinske koristi pribavljene krivičnim djelom u trajanju od šest mjeseci, a koja se sastoji od zabrane otuđenja, skrivanja, opterećenja ili raspolaganja motornim vozilom džip marke Ford. Istom mjerom određen je upis odgovarajućih zabilježbi zabrane u registar nadležnog MUP-a, te povjeravanje na upravljanje predmetnog motornog vozila Agenciji. Dana 29.9.2017. godine izvršeno je preuzimanje predmetnog motornog vozila od strane Agencije, te njegovo deponovanje u skladište Agencije u Rakovici. Istovremeno je obavljen tehnički pregled i fotografisanje motornog vozila radi dokumentovanja stanja u kojem se isti nalazi.

Agencija vrši redovne tehničke preglede motornog vozila putem ovlaštenog servisera kako bi se ustanovila ispravnost i funkcionalnost istog. Pored navedenog, Agencija je angažovala ovlaštenog sudskog vještaka kako bi izvršio procjenu predmetnog vozila, što je i urađeno u oktobru 2017. godine. Kako bi se zaštitilo motorno vozilo od rizika poput požara i poplava dok je deponovan u skladištu Agencije, Agencija je isto osigurala krajem oktobra 2017. godine.

8. Presuda Općinskog suda u Tešnju, datum zaprimanja 26.9.2017. godine

Dana 26.9.2017. godine Agencija je zaprimila Presudu Općinskog suda u Tešnju br. 39 0 K 036138 14 K od 23. 10. 2015. godine, koja je postala pravosnažna 10.6.2016. godine, kojom je utvrđeno da je osuđeno lice nezakonito steklo imovinsku korist u iznosu 32.301,74 KM. Kako je riječ o protupravno stečenoj imovinskoj koristi koja se od osuđenog lica tek ima naplatiti kroz izvršni postupak, to je Agencija, u skladu sa Zakonom, istu presudu neposredno nakon njenog zaprimanja, prosljedila Federalnom pravobranilaštvu na dalje nadležno, zakonsko postupanje. Po naplati predmetnog novčanog iznosa u izvršnom postupku isti će biti uplaćen u budžet Federacije Bosne i Hercegovine.

S obzirom na to da Agencija nakon prosljeđivanja predmetne presude Federalnom pravobranilaštvu nije obaviještena o toku izvršnog postupka, to je Agencija u prvoj polovini oktobra 2017. godine uputila dopis Federalnom pravobranilaštvu kojim se traži informacija o stanju svih predmeta, uključujući i ovog, po kojima Federalno pravobranilaštvo postupa u kontekstu primjene Zakona. Kako konkretno nije dobijen odgovor u kojoj fazi izvršnog postupka je ovaj predmet, krajem novembra predstavnici Agencije su s predstavnicima Federalnog pravobranilaštva održali sastanak na kojem se raspravljalo kako o radu Agencije, tako i Federalnog pravobranilaštva u slučajevima nezakonito stečene imovinske koristi krivičnim djelom, te je još jednom istaknuta potreba, da po ovom i svim drugim predmetima naplate nezakonito stečene imovinske koristi, pismeno obavijeste Agenciju o stadiju izvršnog postupka u kojem se ti predmeti nalaze.

9. Presuda Kantonalnog suda u Sarajevu, datum zaprimanja 6.10.2017. godine

Dana 6.10.2017. godine Agencija je zaprimila Presudu Kantonalnog suda u Sarajevu br. 09 0 K 029038 17 K od 24.8.2017. godine, koja je postala pravosnažna 18.9.2017. godine. Navedenom presudom od osuđene osobe trajno je oduzet gotov novac u iznosu 47 520,00 KM. S obzirom na činjenicu da je u ranijem periodu u ovom predmetu protiv iste osobe izrečena privremena mjera osiguranja imovinske koristi stečene krivičnim djelom koja se odnosila na oduzimanje navedenog novčanog iznosa, Agencija je predmetni novac deponovala na račun za posebne namjene kojim raspolaže. S obzirom na to da je u ovom slučaju riječ o istom gotovom novcu, Agencija je neposredno nakon zaprimanja predmetne presude, izvršila transfer navedenih novčanih sredstava s računa za posebne namjene Agencije u budžet Federacije Bosne i Hercegovine.

Kako je ovo prvi slučaj trajnog oduzimanja gotovog novca u značajnijem iznosu, Agencija je predložila Vladi Federacije BiH donošenje odluke o poklonu u humanitarne svrhe predmetnih novčanih sredstava, zajedno s određenim manjim novčanim iznosom prethodno uplaćenim u budžet Federacije Bosne i Hercegovine po drugoj pravosnažnoj presudi. Vlada Federacije Bosne i Hercegovine je dana 19.10.2017. godine svojim zaključkom prihvatila prijedlog, odnosno inicijativu Agencije, te je i izvršila poklon predmetnih novčanih sredstava Udruženju „Srce za djecu koja boluju od raka u FBiH“.

10. Rješenje Kantonalnog suda u Bihaću, datum zaprimanja 16.10.2017. godine

Dana 16.10.2017. godine Agencija je zaprimila Rješenje Kantonalnog suda u Bihaću br. 01 0 K 011929 17 Kpp 2 od 13.10.2017. godine. Predmetno rješenje je dopunjeno Rješenjem istog suda, isti broj, od dana 17.10.2017. godine zaprimljenog dana 27.10.2017. godine. Predmetnim rješenjem određena je privremena mjera osiguranja imovinske koristi pribavljene krivičnim djelom, a koja se sastoji od oduzimanja nekretnine, poslovnog objekta u Bihaću, te povjeravanjem istog na čuvanje i upravljanje Agenciji. Rješenjem je određeno da izrečena mjera traje godinu dana.

Po prijemu rješenja o određivanju privremene mjere, Agencija je uz asistenciju Sudske policije Federacije Bosne i Hercegovine, dana 19.10.2017. godine izvršila fizičko preuzimanje predmetne nekretnine. Prilikom preuzimanja predmetne nekretnine, konstatovano je da su četiri prostorije unutar iste, odnosno četiri poslovna prostora pod zakupom. Tom prilikom je prikupljena dokumentacija koja se odnosi na pravnu pozadinu tih zakupa, te su sve prostorije fotografisane radi bilježenja stanja u kojem se objekat nalazi u trenutku preuzimanja istog od strane Agencije. Zakupcima je ponuđen nastavak saradnje u vidu potpisivanja novih ugovora o zakupu s Agencijom, na što su isti i pristali, te se zakupnina sada plaća na račun za posebne namjene kojim raspolaže Agencija.

4.2.2. Postupanje po predmetima zaprimljenim u ranijim periodima

Osim novozaprimljenih, navedenih sudskih odluka po kojima su službenici Agencije postupali, Agencija je i u ovom izvještajnom periodu nastavila dalje, nadležno postupanje u predmetima čije sudske odluke su zaprimljene u prvom polugodišnjem izvještajnom periodu 2017. godine s ciljem provođenja sudskih odluka i održavanja vrijednosti predmeta oduzimanja, što je i zakonska obaveza Agencije.

Postupanje Agencije u navedenim predmetima je predstavljeno, kako slijedi:

1. Presuda Kantonalnog suda u Novom Travniku, datum zaprimanja
24.11.2016. godine

Dana 24.11.2016. godine Agencija je zaprimila Presudu Kantonalnog suda u Novom Travniku br. 06 0 K 007444 15 K od 11.6.2015. godine, koja je postala pravosnažna 21.1.2016. godine. Tom presudom utvrđeno je da je osuđena osoba nezakonito stekla imovinsku korist u iznosu 990,00 KM. U proteklom izvještajnom periodu Agencija je istu presudu dostavila Federalnom pravobranilaštvu radi pokretanja izvršnog postupka na imovini osuđene osobe kako bi se presudom utvrđeno potraživanje Federacije Bosne i Hercegovine namirilo. Početkom jula 2017. godine Federalno pravobranilaštvo je obavijestilo Agenciju da je isto počelo prikupljati podatke o imovini osuđene osobe kako bi se nad istom provelo izvršenje.

2. Presuda Kantonalnog suda u Sarajevu, datum zaprimanja 13.12.2016.
godine

U ovom slučaju riječ je o trajno oduzetim dionicama koje su postale vlasništvo Federacije Bosne i Hercegovine. Detaljna postupanja Agencije su bila predstavljena u prvom polugodišnjem izvještaju za 2017. godinu. U nastavku godine, dosadašnji pružatelj brokerskih usluga je Agenciji otkazao prethodno zaključene ugovore, jer je promijenio poslovnu politiku, odnosno više ne pruža svojim klijentima predmetne usluge. Zbog navedenog Agencija je u izvještajnom periodu potpisala novi ugovor sa specijaliziranom kućom koja će Agenciji pružiti brokerske usluge u narednom periodu.

3. Rješenje Kantonalnog suda u Sarajevu, datum zaprimanja: 13.1.2017.
godine

Dana 13.1.2017. godine Agencija je zaprimila Rješenje Kantonalnog suda u Sarajevu br. 09 0 K 026779 16 Kps od 12.1.2017. godine. Predmetnim Rješenjem prema optuženim licima izrečene su privremene mjere osiguranja imovinske koristi pribavljene krivičnim djelom i to zabrana otuđenja i opterećenja udjela-osnivačkog kapitala i korištenje i raspolaganje pravima po osnovu udjela-osnivačkog kapitala privrednih društava UMAX GROUP d.o.o. Sarajevo, Emiran d.o.o. Sarajevo i Emiran Studentski dom - Univerzitetski hotel d.o.o. Sarajevo. Upravljanje navedenim pravnim licima povjereno je Agenciji. Detaljna postupanja Agencije su bila predstavljena u prvom polugodišnjem izvještaju za 2017. godinu. U nastavku godine vršene su redovne kontrole i obilasci navedenih pravnih lica. Održavani su sastanci s privremenim upraviteljima kako u prostorijama predmetnih pravnih lica, tako i u prostorijama Agencije. Značajna promjena u odnosu na protekli izvještajni period

odnosi se na promjenu privremenog upravitelja u pravnim licima Emiran d.o.o. Sarajevo i Emiran Studentski dom - Univerzitetski hotel d.o.o. Sarajevo. Novi upravitelj je počeo s radom početkom novembra 2017. godine. S obzirom na navedeno, izvršena je primopredaja između bivšeg upravitelja, novog upravitelja, te predstavnika Agencije. Također, radi zaštite imovine predmetnih pravnih lica, pa samim time i njihove vrijednosti, izvršen je popis stalnih sredstava istih. O svemu je sačinjen zapisnik, te o istom su obaviještene nadležne institucije.

4. Rješenje Kantonalnog suda u Sarajevu, datum zaprimanja: 13.1.2017. godine

Dana 13.1.2017. godine Agencija je zaprimila Rješenje Kantonalnog suda u Sarajevu br. 09 0 K 026779 16 Kps od 12.1.2017. godine. Predmetnim Rješenjem prema optuženom licu određena je privremena mjera osiguranja imovinske koristi pribavljene krivičnim djelom i to zabrana otuđenja, skrivanja ili raspolaganja pokretnom imovinom, putničkim motornim vozilom marke BMW X6. Istim rješenjem određeno je oduzimanje predmetnog motornog vozila i njegovo povjeravanje Agenciji na čuvanje i upravljanje. Detaljna postupanja Agencije bila su predstavljena u prvom polugodišnjem izvještaju za 2017. godinu.

U nastavku godine preduzete su radnje na očuvanju vrijednosti predmetnog motornog vozila, a koje se ogledaju u obavljanju redovnih tehničkih pregleda motornog vozila od strane ovlaštenih autoservisa, kao i vizualnom pregledu istog od strane uposlenika Agencije. Pored navedenog Agencija je angažovala ovlaštenog sudskog vještaka kako bi izvršio procjenu predmetnog vozila, što je i urađeno u oktobru 2017. godine. S ciljem očuvanja vrijednosti datog vozila, kao i zaštite istog od eventualnih rizika poput poplave ili požara, dok je vozilo deponovano u skladištu Agencije u Rakovici, Agencija je isto osigurala krajem oktobra 2017. godine.

5. Presuda Kantonalnog suda u Tuzli, datum zaprimanja 22.3.2017. godine

Dana 22.3.2017. godine Agencija je zaprimila Presudu Kantonalnog suda u Tuzli br. 03 0 K 011879 14 K od 19.12.2014. godine, koja je postala pravosnažna 14.7.2015. godine. Tom presudom je od osuđenih lica oduzeta nezakonito stečena imovinska korist i to pokretne stvari i građevinski materijal. Detaljna postupanja Agencije bila su predstavljena u prvom polugodišnjem izvještaju za 2017. godinu. S obzirom na činjenicu da prodaja oduzetih pokretnih stvari nije uspjela, odnosno po oglašenim prodajama Agencija nije zaprimila nijednu ponudu, Agencija je predložila Vladi Federacije BiH donošenje odluke o poklonu građevinskog materijala. Vlada Federacije Bosne i Hercegovine je prihvatila prijedlog Agencije i dana 21.12.2017. godine donijela Odluku o poklonu građevinskog materijala Savezu ratnih vojnih invalida Tuzlanskog kantona, te je u izvještajnom periodu navedena odluka i realizovana.

6. Presuda Kantonalnog suda u Sarajevu, datum zaprimanja 18.4.2017. godine

Dana 18.4.2017. godine Agencija je zaprimila Presudu Kantonalnog suda u Sarajevu br. 09 0 K 024765 16 K od 3.4.2017. godine kojom je od osuđenih lica oduzeta imovinska korist stečena krivičnim djelom u ukupnom iznosu od 1.130,00

KM i 350,00 EUR. Kako u proteklom izvještajnom periodu, predmetna presuda nije postala pravosnažna, Agencija je sačekala nastupanje pravosnažnosti iste kako bi po datoj presudi mogla postupati. Presuda je postala pravosnažna 3.7.2017. godine, dakle u ovom izvještajnom periodu, o čemu je Agencija obavještena sredinom septembra 2017. godine. Po prijemu obavijesti Agencija je izvršila fizičko preuzimanje navedenog novčanog iznosa iz prostorija Kantonalnog tužilaštva Kantona Sarajevo, i uplatila ga u budžet Federacije Bosne i Hercegovine.

Agencija je predložila Vladi Federacije BiH donošenje odluke o poklonu predmetnih novčanih sredstava u humanitarne svrhe. Vlada Federacije BiH je dana 19.10.2017. godine svojim zaključkom prihvatila prijedlog, odnosno inicijativu Agencije, te je i izvršila poklon predmetnih novčanih sredstava Udruženju „Srce za djecu koja boluju od raka u FBiH“.


7. Rješenje Kantonalnog suda u Sarajevu, datum zaprimanja 25.4.2017. godine

Dana 25.4.2017. godine Agencija je zaprimila Rješenje Kantonalnog suda u Sarajevu br. 09 0 K 026508 17 Kpp 182 od 24.4.2017. godine kojim su određene privremene mjere osiguranja imovinske koristi pribavljene krivičnim djelom i to zabrana otuđenja i opterećenja nekretnine i stvarnih prava upisanih na nekretnini koja se vodi u zemljišnim knjigama Općinskog suda u Sarajevu. Ista nekretnina je predmetnim rješenjem oduzeta i povjerena na čuvanje i upravljanje Agenciji. Detaljna postupanja Agencije bila su predstavljena u prvom polugodišnjem izvještaju za 2017. godinu. U nastavku godine Agencija redovno vrši kontrolu i monitoring navedenog objekta. S obzirom na to da predmetnu nekretninu, kao zakupac, koristi pravno lice Amoniq d.o.o Zenica, isto vrši redovnu mjesečnu uplatu zakupnine na račun za posebne namjene Agencije. Krajem septembra 2017. godine, a po zahtjevu zakupca, s JP Elektroprivreda BiH d.d. Sarajevo potpisan je Ugovor o povećanju priključne snage za predmetni objekt. Kako se u ovom slučaju radi o luksuznom, a ne nužnom trošku, troškove datog ugovora snosio je zakupac.

8. Presuda Općinskog suda u Tešnju, datum zaprimanja 26.5.2017. godine

Dana 26.5.2017. godine Agencija je zaprimila Presudu Općinskog suda u Tešnju br. 39 0 K 044573 16 K od 9.2.2017. godine, koja je postala pravosnažna 7.4.2017. godine. Tom presudom utvrđeno je da je osuđena osoba nezakonito stekla imovinsku korist u iznosu 19.886,00 KM, te je dužna isti iznos u roku od 30 dana od dana pravosnažnosti presude uplatiti u budžet Federacije Bosne i Hercegovine. Aktivnosti Agencije povodom ove presude su obrazložene u prvom polugodišnjem izvještaju za 2017. godinu. U drugoj polovini 2017. godine, Agencija je početkom jula 2017. godine, po prethodno upućenom upitu, obavještena od strane suda da osuđena osoba nije dobrovoljno izvršila uplatu predmetnog novčanog iznosa u budžet Federacije Bosne i Hercegovine. Prijemom date obavijesti stekli su se uvjeti da Federalno pravobranilaštvo pokrene prijedlog za izvršenje na imovini osuđene osobe kako bi se, presudom utvrđeno potraživanje Federacije Bosne i Hercegovine namirilo. Zbog toga je Agencija predmetnu presudu dostavila Federalnom pravobranilaštvu u mjesecu julu na dalje postupanje. Do danas Agencija nije obavještena u kojoj fazi se nalazi ovaj izvršni postupak, te je zbog navedenog, ali i drugih predmeta u kojima se mora pokrenuti izvršni postupak, krajem novembra

održan sastanak u prostorijama Federalnog pravobranilaštva na kojem je još jednom istaknuta potreba, da po ovom i svim drugim predmetima naplate nezakonito stečene imovinske koristi, pismeno obavijeste Agenciju o stadiju izvršnog postupka u kojem se ti predmeti nalaze.



Grafikon 5: Postupanje Agencije po odlukama sudova u periodu juli – decembar 2017. godine

5. STRATEŠKI CILJEVI

Koncept Godišnjeg Plana rada Agencije za 2017. godinu usmjeren je prema pitanjima koja se odnose na jačanje unutrašnjeg organizacionog i kadrovskog ustroja Agencije i nastojanja da na nivou Federacije Bosne i Hercegovine ostvari još tješnju saradnju s pravosudnim organima, policijskim agencijama i drugim institucijama koje imaju za obavezu postupati po Zakonu o oduzimanju nezakonito stečene imovine krivičnim djelom u Federaciji Bosne i Hercegovine.

Agencija je, u okviru svojih zakonskih ovlasti i obaveza i učinkovitog izvršavanja povjerenih poslova, u sklopu planiranih strateških ciljeva za 2017. godinu realizovala sljedeće aktivnosti:

5.1. STRATEŠKI CILJ 1 - JAČANJE KAPACITETA AGENCIJE ZA UPRAVLJANJE ODUZETOM IMOVINOM

Operativni cilj 1 – Donošenje normativnih propisa za unapređenje rada Agencije

Ad 1. Kako je upravljanje oduzetom imovinom relativno nova oblast u našoj državi, to se i Federalna agencija za upravljanje oduzetom imovinom u svom dosadašnjem radu susrela s određenim izazovima, koji se ogledaju u nedostatku ili nedorečenosti zakonskih i podzakonskih propisa koji uređuju čuvanje, održavanje, korištenje ili

ustupanje i druge oblike upravljanja s različitim oblicima imovine. Iz tog razloga Agencija je nastavila s aktivnostima vezanim za izradu provedbenih akata, kako bi se navedeni problemi prevazišli i upravljanje oduzetom imovinom u krivičnim postupcima odvijalo na transparentan, efikasan način, koji garantuje zaštitu javnog interesa i odvija se u korist društvene zajednice.

U proteklom periodu Agencija je radila na detaljnoj analizi trenutno važećeg Zakona o oduzimanju nezakonito stečene imovine krivičnim djelom u Federaciji Bosne i Hercegovine. Analizom je utvrđeno da pojedine odredbe Zakona nisu dorečene, nisu jasne i precizne, te su za dalji rad Agencije u procesu upravljanja oduzetom imovinom neophodne izmjene i dopune Zakona.

S tim u vezi, Agencija je u izvještajnom periodu izradila radnu verziju Zakona o izmjenama i dopunama Zakona o oduzimanju nezakonito stečene imovine krivičnim djelom u Federaciji Bosne i Hercegovine, s detaljnim obrazloženjima koju je dostavila Federalnom ministarstvu pravde kao ovlaštenom predlagачu izmjena i dopuna Zakona, kako bi isti bio upućen u dalju proceduru.

Za to vrijeme, ispred Projekta „Podrška Vladama Republike Srpske i Federacije Bosne i Hercegovine u borbi protiv korupcije“, koji provodi Britanska ambasada u Sarajevu, u okviru komponente broj 4 „Unapređenje oduzimanja imovinske koristi stečene korupcijskim i drugim krivičnim djelima“, Agenciji je ponuđena ekspertna i druga potrebna pomoć, da se u skladu s komparativnim međunarodnim standardima i dobrim praksama u perspektivi razradi podzakonski akt (procedure) za upravljanje oduzetom imovinom.

Agencija je imenovala članove radne grupe koji su do sada učestvovali na dva radna sastanka, na Vlašiću 15-16. novembra i u Tesliću 20-21. decembra 2017. godine. Na sastancima je ekspertni tim predstavio dokument „Analiza politika u oblasti upravljanja imovinom stečenom krivičnim djelima“, koji sadrži pregled međunarodnih standarda u oblasti upravljanja oduzetom imovinom. Dogovoreno je da podzakonski akt na kojem će se raditi bude harmoniziran s međunarodnim i evropskim standardima, te je u skladu s tim napravljena makrostruktura podzakonskog akta koji će uređivati oblast upravljanja oduzetom imovinom.

Na drugom sastanku izrađen je i tekst podzakonskog akta koji se tiče upravljanja privremeno oduzetom imovinom kako u pojedinim fazama, tako i u pogledu upravljanja različitim oblicima imovine. Sljedeći sastanci planirani su okvirno u februaru - na njemu će se izraditi radna verzija teksta podzakonskog akta o upravljanju trajno oduzetom imovinom, i martu - predviđena je izrada podzakonskog akta za upravljanje oduzetom imovinom, koji će Agencija uputiti Vladi Federacije BiH na usvajanje.

Ad 2. Osim već sačinjenog seta pravilnika u 2015, 2016. i prvoj polovini 2017. godine, čija je obaveza donošenja utvrđena zakonskim i podzakonskim aktima, kojima se uspostavilo zakonito djelovanje Agencije, u drugoj polovini 2017. godine nastavljeno je sa donošenjem dodatnih pravilnika i drugih provedbenih akata, čije odredbe direktno utječu na rad Agencije.

Tako su u izvještajnom periodu donijeti sljedeći provedbeni akti:

- Uputstvo o sačinjavanju zapisnika o primopredaji oduzete imovine;
- Uputstvo o preuzimanju privremeno ili trajno oduzete pokretne imovine nezakonito stečene krivičnim djelom;
- Uputstvo o preuzimanju privremeno ili trajno oduzetih privrednih društava, odnosno osnivačkih udjela u privrednim društvima nezakonito stečenih krivičnim djelom;
- Uputstvo o preuzimanju privremeno ili trajno oduzetog gotovog novca nezakonito stečenog krivičnim djelom;
- Smjernice o načinu prikupljanja podataka, statističkih izvještaja i drugih informacija o postupcima za oduzimanje imovinske koristi pribavljene krivičnim djelom.

Operativni cilj 2 – Razvoj i jačanje kadrovskih kapaciteta Agencije

Ad 1. U prvom polugodištu 2017. godine Vlada Federacije Bosne i Hercegovine je Zaključkom V. broj: 792/2017 od 1.6.2017. godine dala saglasnost za prijem pet državnih službenika u radni odnos na neodređeno vrijeme. Procedura po navedenom konkursnom postupku je okončana, s tim da su tri državna službenika zasnovala radni odnos u izvještajnom periodu, dok će dva državna službenika zasnovati radni odnos u januaru 2018. godine.

Ad 2. Tokom izvještajnog perioda, a na osnovu nastavnih i pedagoških planova i programa edukacije i obuka iz nadležnosti Agencije, kao i učestvovanja u programima obuka koje su organizovali predstavnici međunarodnih institucija, održane su sljedeće radionice, seminari i obuke, i to:

Agencija je na osnovu prijedloga i inicijative Ministarstva sigurnosti Bosne i Hercegovine od mjeseca septembra uključena u realizaciju projekta IPA 2013 Twinning projekat "Podrška borbi protiv pranja novca", čiji je cilj podizanje kapaciteta u Bosni i Hercegovini koji se odnose na prevenciju pranja novca i finansiranja terorizma, s posebnim naglaskom na finansijske istrage. Tako su predstavnici Agencije u izvještajnom periodu učestvovali u sljedećim komponentama navedenog projekta:

- rezultat 4 – predstavljanje relevantnog EU zakonodavstva;
- rezultat 6 – poboljšanje standarda u istražnom postupku pranja novca, predikatnih krivičnih djela i finansiranja terorističkih aktivnosti koji se sastoje od modela za finansijske istrage u vezi s procjenom količine i vrste sredstava i praćenja prihoda od kriminala, i
- rezultat 8 – razvijanje partnerstva s privatnim sektorom i uspostavljanje mreže.

Predstavnici Agencije su također u izvještajnom periodu učestvovali u aktivnostima Ureda Ujedinjenih nacija za drogu i kriminal (UNODC) u okviru regionalnog programa „Mjerenje i procjena organizovanog kriminala na Zapadnom Balkanu“, te dijela projekta koji se odnosi na Misiju procjene dostupnosti podataka u Bosni i Hercegovini.

Jedna od izuzetno važnih i sveobuhvatnih misija na kojoj su učestvovali predstavnici Agencije u izvještajnom periodu je i Misija stručne procjene o krivičnom postupku i organizovanom kriminalu Evropske komisije. Ova misija predstavlja dio aktivnosti koje provodi Evropska komisija u kontekstu priprema za Mišljenje o zahtjevu Bosne i Hercegovine za članstvo u Evropskoj uniji. Cilj misije je procjena kapaciteta nadležnih institucija u Bosni i Hercegovini za uspješnu borbu protiv korupcije, organizovanog kriminala, terorizma, pranja novca u svim fazama krivičnog postupka, od istrage do pravosnažne presude, uključujući i oduzimanje i upravljanje nezakonito stečenom imovinom.

Također, u organizaciji Asocijacije za demokratske inicijative Sarajevo, Transparentnost Srbije i Centra za monitoring i istraživanje održana su dva okrugla stola o temama saradnje institucija u procesu sprovođenja finansijskih istraga u oblasti organizovanog kriminala, korupcije i pranja novca u Bosni i Hercegovini i finansijskim istragama u borbi protiv organizovanog kriminala u Bosni i Hercegovini (izazovi i prepreke) gdje su prisustvovali i predstavnici Agencije.

Osim na navedenim obukama i radionicama, uposlenici Agencije prisustvovali su i sljedećim obukama:

- X stručno savjetovanje tužilaca u Bosni i Hercegovini II panel „Organizovani kriminal i korupcija (organizator Udruženje tužilaca u Federaciji Bosne i Hercegovine);
- IPA II – osnovni kurs i proces pripreme sektorskih planskih dokumenata 2018-2020 (organizator Direkcija za evropske integracije Bosne i Hercegovine);
- Upravljanje projektnim ciklusom i priprema projekata (organizator Direkcija za evropske integracije Bosne i Hercegovine);
- Vještine izvještavanja o procesu evropskih integracija (organizator Direkcija za evropske integracije Bosne i Hercegovine);
- Obuka državnih službenika Agencije iz oblasti Projekt menadžmenta;
- Obuka za proces izrade planova integriteta (organizator Antikorupcioni tim Vlade Federacije Bosne i Hercegovine);
- Regionalna konferencija povodom Međunarodnog dana borbe protiv korupcije (organizator Transparency International u BiH, APIK-a i Antikorupcijske mreže ACCOUNT).

S obzirom na raznolikost obuka kojima su prisustvovali uposleni u Agenciji, ojačani su kapaciteti Agencije jer se samo na takav način može osigurati uspostava sveobuhvatnog i efikasnog sistema za oduzimanje nezakonito stečene imovine krivičnim djelom, što je jedna od preporuka iz izvještaja o napretku Bosne i Hercegovine prema Evropskoj uniji za protekle godine.

Operativni cilj 3 – Razvoj i jačanje materijalno-tehničkih kapaciteta Agencije

Ad 1. Kada su u pitanju skladišni kapaciteti Agencije, a zbog postupanja po većem broju sudskih odluka kojima se od osumnjičenih, optuženih ili osuđenih lica oduzima privremeno ili trajno nezakonito stečena imovinska korist, između ostalog i motorna vozila i druge pokretne stvari, dio skladišta sa kojim Agencija trenutno raspolaže u okviru kompleksa skladišta „Rakovica“ postalo je nedostatno u smislu smještajnih kapaciteta.

S tim u vezi, Agencija se obratila Vladi Federacije BiH sa zahtjevom za obezbjeđenjem dodatnog skladišta za potrebe Agencije. U skladu sa navedenim, dana 19.12.2017. godine Ured premijera Vlade Federacije Bosne i Hercegovine je dostavio Agenciji odgovor Federalnog ministarstva energije, rudarstva i industrije broj: 05-17-1955/17 od 6.12.2017. godine, kojim daju saglasnost za korištenje skladišnog prostora privrednog društva „Operator-Terminali Federacije“ d.o.o. Sarajevo za potrebe Agencije. Skladište se nalazi u okviru kompleksa terminala Misoča, općina Ilijaš, i sastoji se od dva odvojena magacinska prostora, ukupne površine 900 m².

Osim obezbjeđivanja dodatnog skladišnog prostora, u izvještajnom periodu je nastavljeno sa uređivanjem i opremanjem skladišnog prostora u Rakovici koje je Agenciji ranije dodijeljeno na korištenje.

Kod opremanja skladišta s ciljem kvalitetnog skladištenja sa prirodom i namjenom oduzete imovine, bitno je istaći da je u prethodnom periodu uspostavljena vrlo dobra saradnja sa predstavnicima USAID Justice Project in BiH, koji su u nastavku aktivnosti izgradnje kapaciteta radi podrške institucijama i organizacijama koje imaju značajnu ulogu u pravosuđu i dio su šireg djelovanja Vlade Sjedinjenih Američkih Država na unapređenju demokratije i vladavine prava u Bosni i Hercegovine, obećali pružiti maksimalnu tehničku podršku Agenciji, te učestvovati i u opremanju skladišnog prostora sa svom neophodnom opremom. Ta saradnja je nastavljena i u izvještajnom periodu, gdje je USAID Justice Project in BiH nastavio započetu isporuku donirane opreme Agenciji i do kraja izvještajnog perioda, pored već isporučenog digitalnog foto-aparata sa tri objektiva i brojača novčanica, isporučio i sljedeće:

- paletni regal;
- profesionalne modularne skladišne police;
- paletar;
- kolica magacionerska;
- svjetiljka viseća;
- radni stolovi;
- ladice sa metalnim kutijama i
- skladišnu vagu.

Osim navedene, Agencija je također ostvarila i značajnu saradnju s Delegacijom Evropske unije u Bosni i Hercegovini. U okviru IPA projekta „Borba protiv organiziranog kriminala – Međunarodna saradnja u krivičnom pravosuđu“, a kojeg implementira Ministarstvo unutrašnjih poslova Republike Italije, Agenciji su dodijeljena bespovratna sredstva, odnosno donirana i isporučena računarska tehnička oprema vrijedna 19.612 EUR-a, a radi se o:

- desktop računarima s monitorom;
- napojnim jedinicama;
- laptopima;
- printerima i
- multifunkcionalnim printerima.

Ad 2. Kada je u pitanju preuzimanje same imovine u odredbi člana 31. stav c) Zakona, Agenciji je u nadležnost dato i vođenje evidencija o imovini koja se oduzima i sudskim postupcima u kojima se odlučuje o takvoj imovini. Agencija je u izvještajnom periodu uspostavila vođenje evidencija koje su postale obavezan dio poslova koji se obavljaju u Agenciji. Ovo predstavlja jednu značajnu aktivnost iz razloga što forme evidencija koje se vode u Agenciji kroz evidencije o privremeno oduzetoj pokretnoj imovini, o privremeno oduzetoj nepokretnoj imovini, o trajno oduzetoj pokretnoj imovini, o trajno oduzetoj nepokretnoj imovini, o oduzetom gotovom novcu, vrjednosnim papirima, vlasničkim računima, dionicama, udjelima u fondovima, udjelima ili poslovnim udjelima, o uništenoj imovini, o ugovorima zaključenim s fizičkim i pravnim licima kojima je privremeno povjereno upravljanje nad oduzetom imovinom, o sudskim postupcima u kojima se odlučuje o oduzimanju imovine nezakonito stečene krivičnim djelom, predstavljaju najpouzdaniji izvor o realnoj vrijednosti oduzete imovine u momentu njenog oduzimanja, s obzirom na to da su u njoj sumirani najvažniji podaci u pogledu oduzete imovine.

Kako bi proces vođenja evidencija učinila efikasnijim i učinkovitijim, Agencija je u izvještajnom periodu okončala javni postupak nabavke web rješenja za elektronsko praćenje dokumenata. Upravljanje dokumentima u elektronskom obliku s definiranim procedurama omogućuje brzo i efikasno upravljanje dokumentima iz razloga što se kompletna dokumentacija čuva u jedinstvenom skladištu u elektronskom obliku, čije pretraživanje se može vršiti jednostavno, brzo i sigurno. Korisnicima koji su uključeni u sistem upravljanja omogućava se lakši i brži dolazak do traženih dokumenata, čime se ostvaruje bolja komunikacija i kvalitetnije upravljanje.

5.2. STRATEŠKI CILJ 2 – UPRAVLJANJE PRIVREMENO I TRAJNO ODUZETOM IMOVINOM U SKLADU S NADLEŽNOSTIMA AGENCIJE

Operativni cilj 1 – Postizanje efikasnosti i efektivnosti u upravljanju oduzetom imovinom

Ad 1. Postupajući po presudama Kantonalnog suda u Sarajevu broj 09 0 K 029038 17 K od 24.8.2017. godine (pravosnažna 18.9.2017. godine) i broj 09 0 K 024765 16 K od 3.4.2017. godine (pravosnažna 3.7.2017. godine), Agencija je iznos od 49.360,78 KM uplatila na račun Ministarstva finansija Federacije Bosne i Hercegovine u budžet Federacije Bosne i Hercegovine, kao prihode ostvarene provođenjem Zakona, s obzirom da odredba člana 2. stav (2) predmetnog Zakona propisuje da sva imovina koja je trajno oduzeta, postaje vlasništvo Federacije Bosne i Hercegovine.

S obzirom na navedeno, direktor Agencije je Informacijom broj: 01-02-516-1/17 od 9.10.2017. godine predložio Vladi Federacije Bosne i Hercegovine da donese Zaključak o poklonu navedenog iznosa novčanih sredstava Udruženju „Srce za djecu koja boluju od raka u Federaciji Bosne i Hercegovine“ (Roditeljska kuća) u Sarajevu, naročito zbog činjenice što bi se na ovaj način ostvarila svrha provođenja Zakona, te činjenice da je praksa zemalja članica Evropske unije da imovinska korist pribavljena krivičnim djelom koja je oduzeta od učinilaca istih, bude poklonjena institucijama koje se bave humanitarnim i drugim radom kojim se doprinosi očuvanju i razvoju

društvenih vrijednosti, te kako bi se javnosti poslala jasna slika da se kriminal ne isplati.

Na osnovu Informacije Agencije, Vlada Federacije Bosne i Hercegovine je dana 19.10.2017. godine donijela Zaključak V.broj: 1363/2017 kojim prihvata Informaciju za izdvajanje sredstava s pozicije „Tekuća rezerva Vlade Federacije“ Budžeta Federacije Bosne i Hercegovine za 2017. godinu iznos od 49.360,78 KM na ime podrške Udruženju „Srce za djecu koja boluju od raka u Federaciji Bosne i Hercegovine“ (Roditeljska kuća) u Sarajevu, te zadužila Federalno ministarstvo finansija da u skladu s navedenim zaključkom pripremi prijedlog Odluke o odobravanju izdvajanja sredstava.

Presudom Kantonalnog suda u Tuzli broj: 03 0 K 011879 14 K od 19.12.2014. godine sa klauzulom pravosnažnosti od dana 14.7.2017. godine, trajno je oduzet građevinski materijal, te je raspolaganje istim povjereno Agenciji. Na osnovu člana 32. Zakona Agencija je pristupila postupku prodaje predmetnog građevinskog materijala donošenjem Odluke o prodaji javnim nadmetanjem, međutim, ni po prvom niti po drugom pozivu za javno nadmetanje nije pristigla niti jedna ponuda.

S obzirom na činjenicu da postupak prodaje javnim nadmetanjem nije uspio, a da se Agenciji obratilo Federalno ministarstvo za pitanje boraca i invalida odbrambeno-oslobodilačkog rata sa zahtjevom za pomoć u građevinskom materijalu za četiri općinske organizacije RVI i to za pomoć u rješavanju stambenog pitanja njihovih članova, Agencija je sačinila i dostavila Vladi Federacije Bosne i Hercegovine prijedlog Odluke o poklonu građevinskog materijala Savezu ratnih vojnih invalida Tuzlanskog kantona broj: 02-14-564-8/2017 od 15.12.2017. godine.

Na osnovu navedenog prijedloga, Vlada Federacije Bosne i Hercegovine je na svojoj 133. sjednici održanoj dana 21.12.2017. godine donijela Odluku o poklonu građevinskog materijala Savezu ratnih vojnih invalida Tuzlanskog kantona broj: 1722/2017 od 21.12.2017. godine i zadužila Agenciju i Savez ratnih vojnih invalida Tuzlanskog kantona za realizaciju ove odluke.

U skladu s navedenom Odlukom, službenici Federalne agencije za upravljanje oduzetom imovinom su 28.12.2017. godine u Tuzli uručili predstavnicima Saveza ratnih vojnih invalida Tuzlanskog kantona građevinski materijal, čime je Agencija još jednom pokazala ozbiljnost i profesionalnost u svom radu.

O ostalim vidovima efikasnog i efektivnog upravljanja oduzetom imovinom u izvještajnom periodu data je iscrpna informacija u poglavlju 4. UPRAVLJANJE ODUZETOM IMOVINOM.

Ad 2. Kako je upravljanje oduzetom imovinom relativno nova oblast kako u Bosni i Hercegovini tako i u zemljama u okruženju, jedan od ciljeva Agencije je i razvijanje međunarodne saradnje Agencije s organizacionim oblicima u regiji koji su nadležni za preuzimanje i upravljanje oduzetom imovinom stečenom izvršenjem krivičnog djela, te međusobno upoznavanje njihovih predstavnika radi efikasnijeg, a ako za tim bude iskazana potreba, i koordiniranog djelovanja.

S tim u vezi, predstavnici Agencije su u izvještajnom periodu postali član, te prisustvovali II sastanku BAMIN mreže (Balkan Asset Management Inter-Agency Network) koji je održan u Prištini u periodu od 18-19. septembra. BAMIN mreža se sastoji od vladinih agencija iz osam zemalja zapadnog Balkana koje su odgovorne za upravljanje i raspolaganje imovinom koja je oduzeta od kriminalaca. Članice su: Albanija, Bosna i Hercegovina, Hrvatska, Kosovo, Makedonija, Crna Gora, Srbija i Slovenija. U skladu sa BAMIN Uputstvom o historiji, izjavama o namjeri, članstvu i funkciji, Agencija će u toku 2018. godine biti član Upravne grupe BAMIN-a, te učestvovati u planiranju godišnjeg generalnog sastanka, nadgledanja upravljanja mrežom, odlučivanju o aplikacijama za status Člana, Posmatrača i Saradnika i pregledavanju i izveštavanju o pravnim i praktičkim pitanjima.

Na sastanku je, između ostalog, dogovoreno da će BAMIN mrežom u toku 2019. godine predsjedavati Bosna i Hercegovina, te u skladu s funkcijom nadgledati spoljašnju komunikaciju u ime Mreže, te godišnje aktivnosti BAMIN-a.

Osim toga, na upućenu inicijativu Direkcije za upravljanje oduzetom imovinom Republike Srbije, Uprave za imovinu Crne Gore i Agencije za upravljanje oduzetom imovinom u Makedoniji, predstavnici Agencije su posjetili navedene agencije. Cilj službenih posjeta je bio da se kroz najbolje prakse i studije predstave iskustva u području upravljanja oduzetom imovinskom koristi, odnosno upravljanje i raspolaganje pojedinim oblicima privremeno i trajno oduzete imovine.

Tom prilikom razmijenjene su informacije o oblicima oduzimanja, preuzimanja i upravljanja raznim oblicima imovine bilo da se radi o nekretninama, poslovnim udjelima, privrednim subjektima, gotovom novcu, pokretnom imovinom, kao i drugim oblicima imovine uz aktivno učešće svih sudionika ovih sastanaka.

Kako je Agencija posljednja u regiji osnovana kao institucionalni oblik nadležan za preuzimanje i upravljanje oduzetom imovinom stečenom izvršenjem krivičnog djela, ocijenila je da su susreti sa stručnjacima iz regije u ovoj oblasti i razmjena iskustava u daljnjem postupanju tom imovinom bili od velikog značaja za dostizanje standarda Evropske unije u ovoj oblasti.

Ad 3. Radi upoznavanja i predstavljanja rada Agencije međunarodnim institucijama u prostorijama Agencije su održani radni sastanci sa Štefanek Drahoslavom, šefom Ureda Vijeća Evrope u Bosni i Hercegovini i Hintzen Johannesom, predstavnikom Delegacije Evropske unije u Bosni i Hercegovini. Tom prilikom isti su upoznati s načinom rada Agencije, trenutnim stanjem u smislu smještajnih kapaciteta i organizacionom strukturom, kao i dosadašnjim rezultatima u radu.

Na sastancima su predstavljeni planovi i ciljevi rada Agencije koji su u skladu s evropskim planovima rada i standardima. Kako su navedeni gosti izrazili spremnost da podrže rad Agencije, u skladu s ostvarenim dogovorima, Agencija je krajem izvještajnog perioda uputila 10 zahtjeva za ruta mapu TAIEX-a preko Direkcije za evropske integracije, koja je generalni koordinator svih aktivnosti TAIEX-a za Bosnu i Hercegovinu. TAIEX (Technical Assistance and Information Exchange) predstavlja instrument Evropske komisije za tehničku podršku i razmjenu informacija, odnosno za pružanje kratkoročne tehničke pomoći novim državama članicama, te zemljama u

procesu pristupanja Evropskoj uniji u oblastima preuzimanja zakonodavstva Evropske unije i njegovog provođenja u domaći pravni sistem. Sve informacije o prihvaćanju upućenih aplikacija TAIEX-u Agencija će imati do 31. januara 2018. godine.

U ovom dijelu posebno želimo istaći nastavak saradnje sa Ambasdom Sjedinjenih Američkih Država, koji su zainteresovani za finansiranje projekata koje Agencija nije u mogućnosti finansirati usljed nedostatka finansijskih sredstava.

Sastanci ovakve vrste će se održavati i u budućnosti s ciljem dobre saradnje i efikasnijeg rada kada je u pitanju primjena Zakona i rad Agencije.

Operativni cilj 2 - Unapređenje saradnje i koordinacije između Agencije, pravosudnih organa, policijskih agencija i drugih institucija koje imaju obavezu postupati po odredbama Zakona o oduzimanju nezakonito stečene imovine krivičnim djelom u Federaciji Bosne i Hercegovine, kao i drugih pravnih subjekata u BiH

Ad 1. S obzirom na to da je Agencija u prethodnom periodu ostvarila zavidnu saradnju sa svim sudovima i tužilaštvima u Federaciji Bosne i Hercegovine, te da su isti upoznati s tim da je Agencija postala servis nadležnim sudovima i tužilaštvima u Federaciji Bosne i Hercegovine tokom provođenja postupaka za oduzimanje imovinske koristi pribavljene krivičnim djelom, kako tokom izricanja mjera osiguranja i privremenog oduzimanja imovinske koristi, tako i nakon donošenja presuda o trajnom oduzimanju u skladu sa Zakonom, ta saradnja je dodatno učvršćena i u toku izvještajnog perioda.

S tim u vezi u izvještajnom periodu u Bihaću su održani sastanci u Kantonalnom tužilaštvu Unsko-sanskog kantona i Kantonalnom sudu u Bihaću, gdje su također prisustvovali i predstavnici Općinskog suda u Bihaću, komesar policije Unsko-sanskog kantona i predstavnik Odjeljenja sudske policije sudova u Unsko-sanskom kantonu.

Osim toga, u Livnu su održani sastanci s predstavnicima Kantonalnog suda u Livnu, Kantonalnog tužilaštva u Livnu, Općinskog suda u Livnu i predstavnicima Ministarstva unutrašnjih poslova Kantona 10 Livno, kao i predstavnicima Sudske policije u Federaciji Bosne i Hercegovine.

U istom periodu, radi uspostavljanja međuinstitucionalne saradnje, predstavnici Agencije održali su sastanke u Mostaru s predstavnicima Kantonalnog suda u Mostaru, Kantonalnog tužilaštva u Mostaru, Općinskog suda u Mostaru i predstavnicima Ministarstva unutrašnjih poslova Hercegovačko-neretvanskog kantona, kao i predstavnicima Sudske policije u Federaciji Bosne i Hercegovine.

Teme sastanaka bile su primjena Zakona o oduzimanju nezakonito stečene imovine krivičnim djelom u Federaciji Bosne i Hercegovine i međuinstitucionalna saradnja prilikom donošenja i provođenja odluka o oduzimanje imovinske koristi u skladu s odredbama istog Zakona.

Isto tako je zaključeno da će se u budućnosti maksimalno saradivati radi što kvalitetnije primjene ovog zakona u smislu adekvatnog provođenja odluka o oduzimanju nezakonitno stečene imovine krivičnim djelom.

Ad 2. U izvještajnom periodu također je održan sastanak sa **Federalnim pravobranilaštvom**, a tema razgovora bilo je pitanje rješavanja predmeta koji se odnose na oduzimanje imovinske koristi stečene krivičnim djelom, a u kojima je Federalno pravobranilaštvo pokrenulo izvršni postupak. U budućnosti je dogovorena bliska saradnja i redovno koordiniranje vezano za zajedničke predmete.

Kako se Agencija u svom dosadašnjem radu susrela s problemima prijenosa vlasništva i registracije motornih vozila oduzetih u skladu sa Zakonom, u izvještajnom periodu upućena je i inicijativa **Ministarstvu prometa i komunikacija Bosne i Hercegovine** za izmjene i dopune Pravilnika o postupku registracije motornih vozila. Naime, iako odredbe Zakona omogućavaju Agenciji da upravlja motornim vozilima u smislu da ih može iznajmiti ili prodati, problem predstavlja prijenos vlasništva i registracija takvih vozila licima na koja se predmetna vozila prenose najmom ili prodajom. Do kraja izvještajnog perioda nije izvršena izmjena navedenog pravilnika.

Ad 3. Kako Agencija nema operativne nadležnosti, u prethodnom izvještajnom periodu zaključen je Sporazum o saradnji sa Sudskom policijom Federacije Bosne i Hercegovine iz razloga što je ista ovlaštena za pružanje pomoći sudovima u provođenju odluka vezanih za privremeno ili trajno oduzimanje nezakonito stečene imovine krivičnim djelom u skladu s odredbama Zakona o sudskoj policiji.

Pomoć Sudske policije Federacije Bosne i Hercegovine se ogledala u stvaranju adekvatnog sigurnosnog ambijenta pri provedbi sudskih odluka, naročito u slučajevima u kojima se pruža ili očekuje pružanje otpora radi onemogućavanja izvršenja sudske odluke kojom se oduzima nezakonito stečena imovina.

U skladu s navedenim, Agencija i Sudska policija Federacije Bosne i Hercegovine redovno održavaju sastanke, te vrše zajedničke pripremne aktivnosti i razmjenu operativnih informacija, kako bi u skladu s ovlaštenjima i obavezama proisteklim iz sudske odluke, postavljeni zadaci bili realizirani u cjelosti i blagovremeno.

5.3. STRATEŠKI CILJ III – PROVOĐENJE ANALIZA U PODRUČJU ODUZIMANJA IMOVINSKE KORISTI PRIBAVLJENE KRIVIČNIM DJELOM

Operativni cilj 1- Izrada jedinstvene metodologije za prikupljanje podataka i drugih informacija potrebnih za provođenje analiza u području oduzimanja imovinske koristi pribavljene krivičnim djelom

Osim nadležnosti Agencije u domenu upravljanja oduzetom imovinom, zakonska obaveza Agencije je i izrada strateških analiza i davanja preporuka u oblasti oduzimanja imovinske koristi pribavljenjem krivičnim djelom.

Dosadašnja iskustva su također pokazala vrlo neujednačenu praksu, tj. metodologiju registrovanja, čuvanja i dostavljanja traženih podataka od strane sudova u Federaciji Bosne i Hercegovine, što se na kraju odražava i na samu kvalitetu podataka i informacija na osnovu kojih Agencija vrši potrebne analize. Uz to,

zahtjevi koji sve više dolaze iz od relevantnih međunarodnih institucija i koji su rezultat procesa EU integracija, utjecali su na to da Agencija u prethodnom izvještajnom periodu započne aktivnosti na izradi jedinstvene metodologije prikupljanja podataka, statističkih izvještaja i drugih informacija o postupcima za oduzimanje imovinske koristi pribavljene krivičnim djelom.

Agencija je u periodu juli-decembar 2017. godine nastavila aktivnosti vezane za izgradnju djelotvornijeg sistema prikupljanja, procjene, upoređivanja, analize i raspodjele prikupljenih podataka, odnosno na sačinjavanju jedinstvene metodologije za prikupljanje podataka, statističkih izvještaja i drugih informacija potrebnih za provođenje stručnih analiza iz nadležnosti Agencije. U vezi s navedenim, a u okviru svojih nadležnosti utvrđenih Zakonom, Agencija je sačinila Smjernice o načinu prikupljanja podataka, statističkih izvještaja i drugih informacija o postupcima za oduzimanje imovinske koristi pribavljene krivičnim djelom i pripadajuće obrasce.

U izvještajnom periodu predstavnici Agencije održali su više radno-konsultativnih sastanka s predstavnicima Visokog sudskog i tužilačkog vijeća, koji ima najvažniju ulogu o pitanju vođenja Sistema za automatsko upravljanje predmetima (CMS) u kojem se, između ostalog, generiraju i podaci o ovoj vrsti sudskih postupaka, tj. izrečenih mjera u krivičnim postupcima. Na sastancima su razmatrana sva sporna pitanja vezana za način prikupljanja podataka, te je nastavljen zajednički angažman oko navedenog.

Kao rezultat zajedničkog djelovanja na jednom od održanih sastanaka, predstavnicima Agencije prikazan je do sada urađeni aplikativni dio predmetnog softverskog modula (nadogradnja postojećeg CMS sistema). Cilj nadogradnje ovog sistema je da osigura jednoobrazan i pravilan način postupanja od strane svih korisnika, u skladu s pripadajućim ulogama. Namjera Agencije je bila da u ovom pogledu ostvari najveću moguću saradnju i zajednički pokuša unaprijediti metodologiju i općenito praksu evidentiranja i dostavljanja statističkih podataka u domenu oduzimanja imovinske koristi pribavljene krivičnim djelom i time da pruži specifičan doprinos unapređenju rada cjelokupnog krivično-pravnog sistema u Bosni i Hercegovini.

S tim u vezi krajem mjeseca decembra, Agencija je kantonalnim i općinskim sudovima uputila zahtjev za dostavu podataka u skladu sa pripadajućim obrascima Smjernica, za period od 1.1.2017. godine do 31.12.2017. godine, a odnose se na:

- a) zbirne podatke o radu suda;
- b) podatke o pojedinačnim postupcima u kojima je određeno oduzimanje imovinske koristi;
- c) podatke o privremeno oduzetoj imovinskoj koristi iz pojedinačnih postupaka i
- d) podatke o trajno oduzetoj imovinskoj koristi iz pojedinačnih postupaka, s ciljem prikupljanja podataka, statističkih pregleda i informacije o predmetima u kojima je izrečena mjera oduzimanja imovinske koristi. Ova vrsta analitičke građe poslužit će Agenciji u narednoj godini za izradu strateških analiza, te prijedloga poboljšanja zakonskih i podzakonskih propisa u ovoj oblasti.

Navedeni strateški ciljevi i aktivnosti Agencije u 2017. godini su u cjelosti bili usklađeni s odobrenim finansijskim sredstvima u Budžetu Federacije Bosne i Hercegovine za 2017. godinu.

6. OSTALE AKTIVNOSTI AGENCIJE

6.1. Primjena Instrukcije Javnog komuniciranja Agencije i upoznavanje javnosti s primjenom Zakona

U skladu s Planom javnog komuniciranja Agencije, odnosno korištenjem utvrđenih poruka, njihovim pravilnim i pravovremenim provođenjem putem utvrđenih metoda komunikacije navedenih u Planu, uz poštivanje utvrđenih načela komuniciranja, dovelo je do pozicioniranja Agencije u javnosti, kao ključne tačke u sistemu provedbe Zakona.

S obzirom na značaj poslova koje su joj Zakonom date u nadležnost, Agencija je bila transparentna u svom radu i otvorena za saradnju sa svim međunarodnim i domaćim institucijama koje imaju dodira sa nezakonito stečenom imovinom krivičnim djelom.

U izvještajnom periodu posebna pažnja posvećena je publiciranju aktivnosti Agencije vezane za provedbu Zakona, kako bi sve relevantne strukture bosansko-hercegovačkog društva, kao i međunarodne zajednice imale uvida u efektivnost Agencije u realizaciji zadataka zbog kojih je i osnovana. Također je urađen Vodič za pristup informacijama Agencije, koji se nalazi na web stranici Agencije. Vodič razrađuje postupak pristupa informacijama, vrsti informacije koju zainteresovani mogu dobiti, slučajeve kad Agencija odbije pristup informacijama i ostala pitanja u skladu sa Zakonom o slobodi pristupa informacijama u Federaciji Bosne i Hercegovine. Obavještavanje javnosti o radu Agencije vršilo se putem medija, kao i redovnim ažuriranjem podataka na web stranici Agencije.

6.2. Izrada Plana integriteta

Agencija za prevenciju korupcije i koordinaciju borbe protiv korupcije je 2013. godine sačinila Smjernice za izradu i provođenje Plana integriteta broj: 03-50-536-1/13 od 31.12.2013. godine u kojim je precizirano da su sve javne institucije, na svim nivoima vlasti u Bosni i Hercegovini, dužne izraditi i usvojiti Plan integriteta.

U skladu s navedenim, u izvještajnom periodu Agencija je realizovala aktivnosti vezane za izradu Plana integriteta Agencije za period 2017-2021. godine. Tako je Radna grupa za izradu Plana integriteta do kraja ovog izvještajnog perioda osim pripreme faze i faze identifikacije podložnosti Agencije koruptivnom djelovanju koje je realizovala u prethodnom izvještajnom periodu, provela i preostale dvije faze, i to: fazu procjene postojećih mehanizama i instrumenata otpora i završnu fazu, preventivne mjere (aktivnosti, nositelji, rokovi, indikatori i finansijska sredstva).

Nakon toga, prijedlog sačinjenog Plana integriteta upućen je Agenciji za prevenciju korupcije i koordinaciju borbe protiv korupcije na mišljenje i eventualne primjedbe i sugestije. Nakon dostavljenog pozitivnog mišljenja Agencije za prevenciju korupcije i koordinaciju borbe protiv korupcije donijeta je Odluku o usvajanju Plana

integriteta Federalne agencije za upravljanje oduzetom imovinom za period 2017-2021. godine. Ista je u skladu sa smjernicama dostavljena Antikorupcionom timu Vlade Federacije Bosne i Hercegovine. Nakon toga Plan integriteta objavljen je na web stranici Agencije radi upoznavanja javnosti s istim.

6.3. II sastanak Pododbora za pravdu, slobodu i sigurnost između Evropske unije i Bosne i Hercegovine

U izvještajnom periodu predstavnici Agencije prisustvovali su Pripremnom sastanku Delegacije Bosne i Hercegovine koji je održan u prostorijama Misije Bosne i Hercegovine u Briselu i drugom sastanku Pododbora za pravdu, slobodu i sigurnost između Evropske unije i Bosne i Hercegovine, koji je održan u zgradi Evropske komisije u Briselu. Tom prilikom predstavnik Agencija je sačinio Doprinos za diskusiju za II sastanak Evropske unije – Bosne i Hercegovine, Pododbora za pravdu, slobodu i sigurnost, te je u skladu s istim obrazložio rad i dosadašnje rezultate Agencije predstavnicima Evropske komisije.

7. STVARANJE FINANSIJSKIH PREDUVJETA ZA RAD AGENCIJE

7.1. Stvaranje finansijskih preduvjeta za rad Agencije

Ukupni prihodi Federalne agencije za upravljanje oduzetom imovinom za 2017. godinu iznose 748.645,00 KM. Iznos od 500.000,00 KM planiran je Budžetom Federacije Bosne i Hercegovine za 2017. godinu, a preostali dio prenesen je iz 2016. godine u iznosu od 248.645,00 KM kao neutrošeni dio transfera iz 2016. godine.

Planirani prihodi Agencije namijenjeni su za finansiranje plaća, doprinosa i naknada troškova zaposlenih, zatim tekućih izdataka i materijalnih troškova, te nabavku i održavanje stalnih sredstava.

Obezbjeđenjem navedenih finansijskih sredstava stvoreni su uvjeti za pravilno i zakonito vođenje materijalnog i finansijskog poslovanja Agencije.

Računovodstveno-finansijski poslovi za potrebe Agencije i u ovom izvještajnom period vršeni su zaključivanjem ugovora o djelu s fizičkim licem navedene struke.

7.2. Pregled odobrenih i utrošenih sredstava iz transfera na dan 31.12.2017. godine

I Prihodi i primici

Ekonomski kod	Opis	Iznos (izražen u KM)
732100	Primljeni tekući transferi od ostalih nivoa vlasti i fondova (preostali dio transefa iz 2016. godine – Federalno ministarstvo pravde)	248.645
732100	Primljeni tekući transferi od ostalih nivoa vlasti i fondova (transfer iz 2017. godine - Federalno ministarstvo unutrašnjih poslova)	500.000
	Ukupno:	748.645

II Rashodi i izdaci

Ekonomski kod	Opis	Izvršenje za period 1.7 - 31.12.2017. (izražen u KM)
1	2	3
	UKUPNO RASHODI I KAPITALNI IZDACI	313.498
	UKUPNO RASHODI	264.651
6111	Bruto plaće i naknade	138.223
6112	Naknade troškova zaposlenih	24.017
6121	Doprinosi poslodavca	14.514
6131	Putni troškovi	12.984
6132	Izdaci za energiju	2.422
6133	Izdaci za komunikaciju i komunalne usluge	4.833
6134	Nabavka materijala i sitnog inventara	818
6135	Izdaci za usluge prevoza i goriva	4.669
6136	Unajmljivanje imovine, opreme i nemat. imovine	15.781
6137	Izdaci za tekuće održavanje	1.584
6138	Izdaci za osiguranja, bankarskih usluga i usl.pl.pr.	5.953
6139	Ugovorene i druge posebne usluge	38.853
	UKUPNO KAPITALNI IZDACI	48.847
8213	Nabavka opreme	41.836
8215	Nabavka stalnih sredstava u obliku prava	7.011

Imajući u vidu okolnosti pod kojim je Agencija radila u izvještajnom periodu, može se zaključiti da je Agencija u prethodnoj godini u cjelosti ostvarila planirane aktivnosti i vrlo povoljnu međunarodnu saradnju koja će biti od velike koristi za rad u narednim godinama. Isto tako treba istaći da je Agencija djelovala na profesionalan i odgovoran način, dosljedno primjenjujući Zakon. U svom radu je nastojala biti vrlo transparentna i otvorena za sve institucije i uvijek dostupna za pružanje informacija prema javnosti o svom djelovanju. Na kraju, može se kazati da je Agencija sa 31.12.2017. godine u skladu s finansijskim mogućnostima i kadrom kojim je raspolagala, uspostavila dobre pravne, kao i materijalno-tehničke uvjete za uspješan rad u narednom periodu.

Broj:01-05-7/2018
Sarajevo, 08.1.2018. godine

DIREKTOR

Kenan Kapo